


南溪韓公年譜

1920.5.22. 4447

55478

1550



550.589
897

南溪韓公年譜

函 1 冊 書 號 13538

#920.532

55478 4447

南溪韓公年譜序

大抵世運將興必有豪傑起而締造之其衰也亦必有人焉力救時艱維持大局而成敗利鈍聽之于天自古迄今彰彰可考如南溪韓中丞卽其人也公處爲名士出爲名臣其志向之遠大品行之直方諮訪之冲虛謀爲之勇決概從知言養氣之功以出予于公從事年久知之最深恐事蹟久而就湮致輯史者未由採取爰將見聞所及代叙年譜用備遺忘卽以傳信云爾同治三年歲次甲子仲春穀旦胥浦陳昌運書于思南郡署

南溪韓公年譜

胥浦陳昌運撰

公韓姓名超字寓仲號南溪世居直隸永平府昌黎縣城南五十里之韓家營

嘉慶五年庚申

年一歲十一月十三日生

嘉慶六年辛酉

年二歲

嘉慶七年壬戌

年三歲

嘉慶八年癸亥

年四歲是年胞弟培元生

嘉慶九年甲子

年五歲

嘉慶十年乙丑

年六歲

嘉慶十一年丙寅

年七歲

先資政大夫教以誦讀略識之無是年胞妹生

嘉慶十二年丁卯

年八歲

是年入塾受業于從堂叔祖仰賢公讀四書

嘉慶十三年戊辰

年九歲

受業仰賢公讀詩經書經

嘉慶十四年己巳

年十歲

受業仰賢公讀書經易經

嘉慶十五年庚午

年十一歲

受業仰賢公讀易經禮記

嘉慶十六年辛未

年十二歲受業仰賢公讀左傳

嘉慶十七年壬申

年十三歲受業于從堂叔一山公讀左傳及朱子章句

嘉慶十八年癸酉

年十四歲受業于劉子欣先生學為文詩

嘉慶十九年甲戌

年十五歲受業劉師

嘉慶二十年乙亥

年十六歲受業劉師赴縣府應童子試

嘉慶二十一年丙子

年十七歲受業劉師赴院試未獲選是年娶太學段公屏翰之女誥贈夫人段

氏

嘉慶二十二年丁丑

年十八歲受業劉師赴縣試

嘉慶二十三年戊寅

年十九歲受業劉師正月赴郡應試入泮學憲爲濱州杜石橋先生

嘉慶二十四年己卯

年二十歲受業劉師初應鄉試

嘉慶二十五年庚辰

年二十一歲受業劉師是年胞弟完姻

道光元年辛巳

年二十一歲受業劉師再應鄉試

道光二年壬午

年二十三歲受業劉師三應鄉試連年饑饉 先太夫人親操井臼日以窮

乏爲憂鬱成疾

道光三年癸未

年二十四歲受業劉師是年二月初三日 先太夫人溘逝 先資政大

夫念結髮伉儷以憂鬱沒誓不再娶鰥居二十餘年

道光四年甲申

年二十五歲應樂亭縣魏氏之聘教授生徒

道光五年乙酉

年二十六歲仍館魏氏四應鄉試

道光六年丙戌

年二十七歲仍館魏氏是年胞妹適劉氏

道光七年丁亥

年二十八歲仍館魏氏

道光八年戊子

年二十九歲仍館魏氏歲試考列一等學憲爲南昌彭 先生五應鄉試

道光九年己丑

年三十歲在家設館授徒

道光十年庚寅

年三十一歲仍設館于家科試考列一等食廩廩學憲爲浙江沈鼎甫先生是年長子演東生

道光十一年辛卯

年三十二歲仍設館于家六應鄉試

道光十二年壬辰

年三十三歲仍設館于家七應鄉試

道光十三年癸巳

年三十四歲仍設館于家

道光十四年甲午

年三十五歲仍設館于家八應鄉試取中副榜第二名房師爲德清蔡雲士先生主考穆史汪姚四座

道光十五年乙未

年三十六歲仍設館于家九應鄉試

道光十六年丙申

年三十七歲仍設館于家

道光十七年丁酉

年三十八歲仍設館于家十應鄉試

道光十八年戊戌

年三十九歲仍設館于家長女生

道光十九年己亥

年四十歲仍設館于家十一次應鄉試是年粵海氛惡慨然有投筆請纓之志

道光二十年庚子

年四十一歲仍設館于家十二次應鄉試

道光二十一年辛丑

年四十二歲應本縣曾明府之聘入署授徒

道光二十二年壬寅

年四十三歲數年前曾就直隸州州判職因累試不第欲捐足本職分發分省
學習銀不足數僅捐足雙單月選值天津防堵赴軍投効議和撤防保准以本
職遇缺卽選

道光二十三年癸卯

年四十四歲住京投供候選又應鄉試連前十三次矣教讀于龍爪槐廟及光
州徐主事寓所以資日食

道光二十四年甲辰

年四十五歲值貴州奏請揀發于二月間以直判借挑貴州府經歷三月由家
起身六月到貴陽十一月委署三脚屯州同篆務十二月到任

道光二十五年乙巳

年四十六歲在三脚屯任因地多劫搶勸民聯團並時時親歷各村訓誡之五

月十六日巳時聞盜劫距城十五里之苗親場之岑姓公簡募差役與市民之
勇敢者共三十餘人會營冒雨馳救比至盜已飽颺跟逐六十里日暝宿民家
探知盜在五里外造飯定計五更分股一繞截其前一攻其後而盜早于三更
時遠遁追之不及乃還民甚感悅此後盜亦屏息東道陸公元煥察悉情形大
爲揄揚于省憲是年長子演東完姻

道光二十六年丙午

年四十七歲二月卸三脚任回省

道光二十七年丁未

年四十八歲五月委署獨山州篆務是月到任稟辭之日巡撫謂公曰獨山地
廣俗刁劫盜訟棍層見迭出素稱難治故擇能而使委汝前往對曰大人若爲
卑職作主不甚拘以文法卑職能辦巡撫曰准汝便宜行事好爲之公到任訪
士人有品者尊禮之謂此人足不及城市有古賢士風官斯土者應致敬盡禮
以風士林于是士人咸思自愛不預詞訟間有無賴之徒唆訟扛訟者懲治數

人其風漸息念戢盜莫如齊團延城鄉公正紳耆十餘人款以殺饜縷陳齊團之利並引古今成事證之凡若何聯絡若何守望若何堵截若何尾追接仗之頃步伐若何止齊若何張示之外復爲口講指畫衆聞而欣然樂從一鄉團練既成必請公親閱公輕車簡從徧歷各鄉自備旅費杯水不擾討訓團練之暇呼其父老子弟教以孝友睦婣任恤道破俗情勉以大義聞者怦然感動山北兎場之蕭毛大城東雞場之余王蔭各霸一方窩匪強奪威嚇取財人不敢校亦不敢訴官恐致殺身之禍公用莫生縛蕭用廖生縛余立致之死兩月之內北東兩方巨患皆除城南慙寨素爲盜藪役至則毆逐之案積如山無如之何公一日詣鄉驗屍計離其寨不遠可以用計辦理驗畢歸途夜宿一村距其寨十里密誡兵役四十餘人曰明日迂行出慙寨相機行事可辦則辦不可則止爾等切要將心放穩不可驚惶行五里許聞慙寨鳴鑼吹角兵役傾耳以聽公笑曰不必聽他須臾見百餘人登山瞭望言語喧囂如欲拒敵者然兵役曰登山矣公笑曰不必看他比至寨聲形俱寂蓋見來者從容莫能揣測遂半

匿山林半匿室內公肩輿入寨擇地下輿坐胡床吸烟飲茶不動聲色久之寨人見其無他間有來前者公從容與談農穀及入城道路來者聞而益前內有一人氣象不同問之劉姓在此教讀兵役密告公曰此人卽此寨之謀主宜加意公與閑談漸及寨人不法事謂凡告必有訴此等愚民任人告官彼一味避匿無有分訴是以誣之者益多汝宜開導若輩劉曰甚是甚是當徐諭之先是公知寨分大小二村大者北小者南路在小寨公先坐小寨路旁預分十人持械繞循大寨北之山麓飭伏林間聽公在小寨响鎗二聲便出林赴大寨縱火穿寨而南却回顧北山林內呼三棒汛兵在林內等候不必出也緣寨近三棒汛天下太平人畏兵威故以此虛張聲勢且出奇雖止十人使之莫測多寡是時公留劉姓在身邊爲質料羣匪顧其謀主且奇兵另至林尙虛伏汛兵必不敢輕動適匪之匿室內者惡役過其門舉兵相擬者數人役執之以獻遂乘勢响鎗兵役齊動而伏林十人亦如誠而起匪驚竄僅擒十八人公諭之曰人多告爾等爲匪爾等愚蠢終不赴案所以誣告爾等者更衆今我帶爾等到

下司土官署一問如果負屈卽申下司開釋離爾家止三十里耳又諭劉曰汝乃讀書人此寨以後託汝化導有成效我必獎汝此番到下司問案汝可同往以開導渠輩回日汝與俱回劉姓願同往將行忽雨公念附近皆不良之寨行至下司始脫離匪境雨滑行遲難達中途無可駐足不如宿此明日徐行遂命噉飯勿近酒知該處慣毒人故也飯畢雨止仍行所帶十八匪合劉姓共十九人每數人以兵役間之知前路崎嶇難行走使輦空轎公乘馬爲殿旣出寨察役尙缺九人知其噉飯命催之公下馬坐盤石上吸烟以俟九人飯畢齊來公始上馬步伍整齊暇豫不迫遙見山上觀者錦簇無敢放恣初更入下司土官署食後謂劉曰夜已深不及訊明日州署再訊矣將行劉請回強之同行安抵州城下獄愍寨告人曰我寨向不知何者爲官乃竟來寨拿人拿畢不行尙噉飯出寨又下馬坐石上似此舉動不知暗中還有多少兵馬見之膽寒言之吐舌

琴寨亦盜藪前州牧親至其寨衆毆而走之差役奉票不敢往緝公派役授意

前往縛其首從數人以歸

一染坊被劫報案票差緝獲夥盜白姓託悉黨與約數十百人多是某寨土著派差往捕羣起拒敵差潰有二差及染坊引路人陝姓被盜捉去欲擇日殺以祭旗若大兵來討卽遁入粵西至日縛三人于樁一僧痛陳利害方罷仍縛而墜之石洞時時引出鞭箠燒刺公聞信商之同寅幕友咸謂如此兇狠急之恐變若激成軍需上憲必尤之不如姑且含忍徐以圖之公不以爲然乃集諸總役諭之曰今日之事人言如此以我想來怕成軍需姑且含忍倘另有反亂者起豈能不辦若遇盜案便怕成軍需則盜風愈熾禍何可言聞我未到此以前爾等不敢出城南五里有之乎衆曰然公又謂爾等旣不耕田又不負販來此充役必係遊手好強負氣敢鬪之人豈畏盜匪特前官不爲作主所以爾等束手衆曰然若官肯作主我等未嘗惜命公反手指鼻曰此人姓韓乃不畏疆禦之男子也爾等若隨我去則與軍前一樣無論生擒殺斃均有賞資若因殺死省中辦擅殺之罪則我在行間我自當之如牽累爾等則非人類鬼神臨上大

堂外萬衆觀聽敢食言乎十三總役齊聲高叫曰如此不需官親往我等皆願
決命無不成功是時堂前差役數百皆努目豎眉有如臨敵公退呼總役密語
之曰爾等既齊心大事必成但布置亦須得法爾等各帶手下人分十三股每
股約百人宜于五更潛抵賊寨以八股分八面圍寨而寨南之東西二寨與賊
寨爲品字形素同氣類以四股紮于賊寨之南以杜二寨來援以一股救出洞
內三人先護入城謹依我言必可得手回日排隊徐行倘追至則殺所擒以拒
我再親往接應衆依計而行賊不能敵擒二十餘人以歸距城百里爲徐行故
行三日方至沿途觀者如堵自此各鄉踴躍團務大行臬司通飭下游府廳州
縣囑全照獨山辦理

獨匪有越境劫都江廳者移文指名來索派役圍拿解送自此劫盜斂跡村民
夜失牛偷兒去後事主覺而追之不及乃依團練章程鳴鑼吹角須臾角聲四
起近者助追遠者截路偷兒棄牛匿草間事主獲牛以歸
一染坊被竊亦鳴鑼吹角遠近應之偷兒無處可逃人賊俱獲士民欣喜曰誰

料團之利益如是哉

公去任後而團漸弛五年後獨匪楊元保等反亂公奉調往征雖不能立復舊
團而民間公至多肯出力故不四月而賊平

道光二十八年戊申

年四十九歲六月卸獨山事回省十月聞訃驚悉 先資政大夫于七月初
三日溘逝立即成服開弔因乏資斧難遽奔喪欲圖一館地以修金作歸資遂
就興義知府後升東道張公之館教其四子

道光二十九年己酉

年五十歲正月到興館十二月回省

道光三十年庚戌

年五十一歲正月起身北上五月至家聞賊起廣西之貴平縣

咸豐元年辛亥

年五十二歲起服南下五月至貴陽十月黎平胡太守邀公赴黎帶勇緝盜除

公文請院司派往外並函託首縣勸駕胡卽後來巡撫湖北戡定鄂疆太子太保諡文忠名林翼者也是時粵匪鴟張粵湖三江所在緊急胡公憂國如家愛才如寶不矜己技善集衆長公季冬抵黎一見魚水言聽計從教演勇丁漸臻熟習

咸豐二年壬子

年五十三歲粵匪有入犯之說公帶勇紮營懷遠縣之靠頭以防粵匪竟日操習水陸俱防聯絡黔粵鄉團爲助賊不敢近秋冬之際烏沙雷公山苗匪肆劫省憲命胡公往勦公爲前敵數月之中斃匪數百至明年三月而事平九月長孫方炳生

咸豐三年癸丑

年五十四歲是年五六月公在省養病黃平甕安奸民先後滋事胡公親督勇丁勦平公以病未興七月委署清江通判八月到任胡公已升東道是時湖北大亂省城屢陷奏調胡公赴鄂公赴鎮遠送之代挑

勇士六百盤桓十五日胡欲公同往公辭之曰黔不久必亂我任此十年養家葬親皆出于此平時食其祿及亂而坐視之我不忍公辦鄂我辦黔可也他日帶兵周行各處尙可相見胡登舟去果子明春獨山變起

清江爲苗藪內苗與外苗勾結劫奪肆行曾戕武官殺死兵役通判親出屢被逐回一日白晝劫城門外居賈文武不敢救護緊閉城門無一人敢登城瞭望賊得財後由北門循牆徐行至東門始離牆而去城中協府有存城兵六百人

不發一矢武備廢弛至此曷勝浩嘆公以廉俸募勇丁六十一日三操練習陣法數月悉成精銳奸民聞而畏之河下畧拐之船永不敢行走除盜之法各鄉用人哨探有踪卽派勇往捕苗賊之烏鎗環刀是其長技遇勇卽敗擒斬無數

四境肅然

咸豐四年甲寅

年五十五歲三月獨山州匪徒楊元保等造反公奉文往征添募精勇二十共八十人于三月二十三日抵獨山先是他軍奉調經過州縣意外需索甚至入

署大譟刀砍堂柱公過州縣自發軍食秋毫無犯亦不聞嘈雜之聲官民稱爲紀律之師公以此語勸勉勇丁使之益知謹飭

公抵獨之前賊圍城經來援之楊遊擊廷柱擊退三月二十三日楊與徐知縣帶兵勇千三百人由望城坡進紮土井是日公到城明日聞賊欲由甕坑繞攻城之西南以牽制土井之衆公立出城紮營甕坑二十五日黎明古州馬守備率兵二百二十至營與公合軍進駐大地

二十六日公與馬弁督師前進將紮營聞賊衆數千于一二時前往撲土井大營公命停紮率師跟追翼與楊徐成夾擊之勢行至八九里外遇賊轉回公率親勇八十當先陷陣殺賊數百賊四散奔逃越二日英叅將率提標兵四百至營與公合軍

此後破播讓洞地壩洞捷于董你楊元保窮蹙四月二十二日自粵地擒元保解省正法或欲以此蕘事公不可曰反者本多股而奏報止舉元保今元保雖擒餘股尙多撒師而餘股大熾咎將誰歸爾時上憲責令終局難于此日矣或曰此後再辦多是粵匪不可怒也怒之則留至難敵公以理勢徐釋之或無言而退

五月初一日攻破蠻往十一日移駐蠻維燒殺賊匪又移駐四亭與拉溜二十一日攻董甕山山甚險峻先二日楊軍與邱貢生之團攻之不下邱勇陣亡三人公冒雨進軍見山勢難攻誘之使下擒賊首劉仲林丁老喬及男婦二百餘人是時各股敗匪盡入南丹之芒場大山楊徐分軍後陶前令履誠贊助楊軍楊陶邀公與徐進駐芒場徐不願往退歸州城公與楊陶至芒場楊營之兵以南丹炎熱譟而欲歸公營提標之兵亦然百般諭之竟不能止於是回駐四亭兩軍勞久思歸環請卽撤勢不可止不得已許以緩緩撤歸俟上憲許歸文至卽撤回州城於是楊陶退紮三棒公退紮鐵坑以徐俟上憲許歸與否之文其實並未稟於上憲姑退紮以安軍心且以候四亭之消息

是時鄉民固求勿撤奈弁兵驕不用命不得不退密語鄉民官軍姑退紮數十里以觀動靜不遽歸城

六月初四日四亭何監生等赴營飛報謂賊復來現攻打金龜石泣請速回禦敵公設法勸慰軍士明日仍回四亭

初五日至四亭初六日獨匪粵匪約數千先後大至我軍接仗獲勝分股逐賊左股忽却賊乘之遂敗是夜楊派千總賈連陞率兵五百來援

初七日賊以數倍之衆來犯公分三股待之戒勿輕動俟賊入窄處然後擊之必勝賊鳴角揚旗作來撲之勢終不輕出蓋憚入窄處也自晨至午相持不戰賊乃於三路之中以中路虛張聲勢似欲赴窄處拒我中股卻增厚左右二路前進高聲喊叫跳舞若狂我軍凝神寂聲靜以待之公飭聞我吶喊然後羣和先是公派賈連陞帶二百人駐於右股之後以便相機應援公知中股窄徑賊不出此戒中股俟左右股進則中股亦進賊勢中虛不能抵拒但須急火四亭賊營火起即是大功切記切記賈弁見賊左右二枝漸進遽從我軍右股之右衝出賊不意賈軍突出大驚忽賈兵砲斃一賊賊懼反走先是公察知賊之精銳在右且紛至沓來其勢浩大乃身率左股當之正在督戰見賈兵得手立飭

軍士隨我大喊餘股因同喊聲若崩山催左股齊進賊前鋒却退逐之賊右路正伏數千人踉蹌齊遁此左股情形也中股乘勢猛進燒四亭賊營賊輜重老弱皆燬左右二路賊見火起益驚須臾右股與賈兵俱至四亭此中右二股情形也既得手後三股分追斃賊約八百餘人沿途鄉民截殺與獨匪粵匪互相殺三日內共斃賊一千五百餘人經此大捷獨境始平論功公升知縣加同知銜並賞戴花翎

七月公赴省銷差閏七月回清江任八月桐梓縣匪徒楊龍喜造反陷城並陷仁懷安南普安各縣城分攻綏陽正安黔西遵義各城公奉調與遊擊烏爾滾珠統帶丹江清江台拱鎮遠四營兵丁並公親勇百名共九百五十人赴桐勦賊八月十八日公自清起身中途遵義告急改赴遵義二十六日至團溪水與烏及四營弁兵相見烏本不欲俟公至自帶兵先赴遵義因正路賊沮繞行他路他路又有賊沮如是者數次不敢前進聞公將至聽衆弁勸語回至團溪水晤公公謂直走路寬而近繞走路窄而遠且繞則示賊以怯直行則示賊以勇

衆曰直行好遂於二十八日宿龍平二十九日公帶親勇爲前鋒清兵繼之抬兵又繼之烏率丹鎮兵在後均定遇賊戰鬪之法切戒撓越驚惶中後遇賊我必救援前鋒遇賊中後但立定脚跟不需來助我自抵禦我進則遠遠隨行可也能遵我約賊不足慮衆諾之行至離城十餘里之地聞隔山角聲知賊出拒使清兵登右梁與公犄角使丹鎮兵接應清兵自率親勇當先使台兵爲接應賊先見右梁兵正在注視公以前鋒由左突出賊失措勉強接仗斃數十人遁入丁字口大街公統全軍入城

與賊迭戰於城外之獅子橋紅花岡白虎頭螺螄絡鳳凰頭空閣寺一帶均獲勝仗並屢解趙提督徐知縣之危

是時西南至普安安南東北至正安方千里之地賊踪徧滿遵城外雷台山大因保二處賊營棋布其勢浩大公閱視城外地勢惟紅花岡最要賊據則俯瞰城內我駐營則城外必無虞欲出紮于此而弁兵不願久之設法紮出楊逆見官軍占踞要地深責僞將李七三躋紅花岡而不踞終爲官軍所踞也李銜之

遂分軍

城外營八座滇二營可以自保趙提督五營每戰必敗公營屢救趙軍得不全覆文武會商議論不一遷延退縮賊勢日張公時獻策如以水投石遂不復言一日會商咸以官軍屢敗爲憂相對長嘆束手無策衆目公曰兄計安出公謝以無策衆固請公對如初督辦承觀察引公至別室曰兄平日一番爲國爲民志氣若何遠大近日不發一言今日仍固辭而不畫一策我與兄自獨山共事頗蒙不棄今日務念舊交賜一生路但力能辦無不遵命以行公曰兵要出奇制勝賊席屢勝之威有輕我心以爲彼來攻我是常絕無我往攻彼之事承曰然公曰我與趙各將一軍分攻雷台山大因保今夜三更造飯四更出營伏於賊營近處黎明潛襲未見賊要靜密既見賊要勇猛依此而行必得手承甚以爲然言于衆皆以爲可立寫軍帖數紙分給將弁依約而行議定趙攻雷公攻大是夜四更公帶軍潛伏賊營近處熹微辨路卽進崎嶇之甚降如墜井躋如登天不言不噓悄靜而前離賊營數十步賊始覺驚呼慌亂我軍大喊震天一

擁而入一面斫殺一面縱火賊營三座登時踏燬分軍追殺餘賊遁歸雷台山正欲收軍城內彭協專人來告曰趙違約天明始起日出鳴角高舉旗幟而行與平日出隊無異賊知而迎之半途接仗趙軍傷亡數百大敗而回請兄速退否恐雷大二股萃于貴軍也公乃分軍爲左右二枝左拒則右退右拒則左退更換不准踰五十步傳令甫畢賊果蜂擁而來見如此收軍遂不敢逼我軍徐收以歸不數日賊復築大因保營壘

城外十里大街墻屋堅固賊匿其中以爲雷大外郭逼近城垣大爲城營之患公始至卽倡議燒之人多不以爲然十月以後日日打仗官軍一面拒敵一面拆屋爲薪數十日間街屋漸稀賊漸縮入雷大其勢日蹙

先是公以親勇太單遣弁赴下游募勇日久未來是時川兵克復溫水桐梓九壩等處鄉團四起翦賊羽翼遵城外逐日鏖戰不休每夜公遣人驚擾之賊一夜數起楊逆憂之公遣閒入賊營散布流言張我聲勢並於十二月十五日戰畢收軍之際使聲洪者登高大叫曰楊龍喜奈何至愚極妄如此自古豈有皂

隸作天子乎且李七全軍覆沒矣官兵團練紮于蒲老場一帶屢敗汝軍汝等血脈不通矣遵城汝不能得大街全燬雷大孤立破汝卽在早晚矣川兵克復桐梓仁懷溫水九壩場汝等退無所歸矣汝造反應死可惜隨汝者俱是好人乃與汝同死耳喊叫三次是夜楊與其黨密商逃遁將赴粵西十六日官軍索戰賊猶出拒力不能支漸漸退縮火箭飛燒其營又自己失火燒火藥數百斤烟燄漲天官軍正在進逼忽來一軍約數百人從容而介立於官軍之間問之答曰新添之韓勇昨到紅花岡營公親勇聞而相詰數百人忽喊殺傷官軍數人始知爲賊官軍大駭陣遂亂紛紛退走兵賊錯雜賊不辨兵無可斫刺兵不辨賊不知所拒退入山溝公正坐小山督戰見兵勇過山下大聲謂之曰賊並不多爾等何以遽退對曰不辨誰是賊所以退也公舉手虛指兵勇後曰彼卽是賊爾等殺回可得重賞其實公亦不辨也兵勇聞而止步回頭賊聞之以爲公立高處定已辨明誰是賊匪遽反走兵勇見其反走知其是賊合力追殺賊大潰一賊渠執大白旗隨衆潰退公身邊一兵善九節力大砲兵勇退時公飭

連放大砲遙轟後賊以緩其追至是一砲正中執旗渠倒地于是賊之在營外者全遁入營日已夕官軍亦歸

是日公歸營所募新勇四百亦至是夜三更賊燒雷大營盤而遁十七八日各營先後追逐公因新勇初至十七日點驗編伍簡放隊長十八日教演陣式十九日拔營追賊探聞賊入磨盤山由董公寺追至混子場沿途殺賊黨七八十人探悉賊未出此寔往黔西與安底之王三乍巴合夥乃返遵城將由遵赴黔西適接巡撫書謂各軍西追省城空虛飭公迂路至札佐相見再由札赴黔以遮省城公于除日至札佐謁見巡撫

咸豐五年乙卯

年五十六歲正月初一日辭行向黔西沿途搜殺賊黨及遊勇之擾民者抵黔城圍已解賊竄大定

十七日公至大定賊竄畢節又折向東南公慮其入粵越境則勦辦倍難時分八股追賊公商之各股謂非攔頭恐入粵西今擬各軍追尾我軍攔頭衆以爲

是遂謂賊跡期出賊前賊打大灣轉十九日聞賊趨扁担山公迂路赴鎮甯州二月初三至巴路遇雨聞賊在坡貢初五赴坡貢賊方早餐聞公至遽走急追之行數里至枏口山山高徑陡賊欲便于登躋盡脫紙甲拋棄曲徑既登見山勢險峻可守可戰遂據以拒我鎗砲齊發掀巨石滾下滾時磕動羣石放一石下便有數石至地公知難仰攻密派烏旗等隊由右路繞登以攻其左使賈都司率部兵由左路繞登以攻其右自督勇貼身山脚用鎗砲遙擊以攻其中巨石連傷數勇公足邊有巨石滾至衆勸稍退數步公不肯衆因益奮無肯移足半時許見烏旗已登殺賊賊反奔公大呼曰烏旗已登爾等速上貼山脚者喊殺騰上賊大潰公命一面追殺大股一面搜山林內匿賊忽有一二百人由枏口寨中衝來隊長楊紹賢迎之與當先賊首交鋒賊矛墜地賊手撥楊矛而進互相揪扭滾落坎下羣賊齊進勇丁奮殺賊首並斃賊黨十餘人餘賊遁去是役賊占地利捨死抵拒卒以右路出奇制勝惜左奇畏縮未能早登設早登則三路合擊可以盡滅賊匪後獲生口知所殺賊首卽王三乍巴也

是時官軍追賊者股數衆多然多不敢接仗有與戰于大岩脚者爲賊所敗自坡貢一仗後官軍或敗賊於關嶺或敗賊于羊場賊勢漸微旋又連挫官軍其勢復振公急欲追及與決奈一聞公近卽兼程奔走苦于難及乃簡銳五百不携鍋帳不運米糧不紮營壘夜宿民房買飯以便行走每日行八九十里或百里冒稱某營韓弁之軍使賊不忌三月初五日至龍溪聞是日特白二軍敗績於猴場約特白兩協明日平明與公合勦於猴場二將允諾初六公至猴場特白不至正欲以所部獨勦詎知東方未明時賊向葛彰司竄去公料賊行三十里至葛必食須停歇一二時趁此急追可及遂命捲旗靜悄以進近賊始張旗大呼韓軍來矣自坡貢後辛苦又一月今日始得及賊幸甚遇賊力戰不必生擒勿獻首級殺倒卽進總以多殺爲主衆曰唯

離葛二三里知賊方食遂分二路大隊由正路公親率百餘人由山頭高處犄角而進里許賊瞥見遽鳴砲吹角渡河一舟沈溺死數十人既渡繫舟西岸使追兵無舟可渡並排列岸上以拒我軍至河干始張旗大呼如飭賊驚顧曰又

是此輩來我軍無舟分股躡淺徑渡方至河面之半賊已大奔我軍登岸見賊遁入山口公懼其據險死拒揮紅旗隊先登左山然後督大隊入山口賊果拒守交鋒殺傷二勇見左山紅旗隊大呼馳下賊潰走

先是公謂諸隊長曰楊逆不死事無了期彼自負英雄假仁義以籠絡其黨可用計使其心灰黨散後當迫逐時使聲洪者一人高叫曰汝既造反亦是好漢奈何不達時務汝窮蹙至此尙將安往縱逃至天邊終被擒獲

皇上祇要汝一人其餘概從寬宥汝是必死之人忍以汝一人之故使親戚朋友皆死于跋涉死于刀兵乎再三高叫却竭力追殺衆曰謹記逆因傷病不馬而輿是日見事急棄竹輿負以逃踰山五層至六層山腰追者至負者疲困不支楊逆亦氣喘難續忽聞高叫如前飭遂坐地不行其黨勸行楊逆舉刀叱之其黨捨之去楊逆自刎甫橫刀我軍逼近攢刺斃之驗明首身飛解巡撫行轅巡撫奏捷公以斬王三年巴功升同知直隸州以斬楊龍喜功升知府餘賊竄銅仁公追至銅賊又他竄而台拱廳告急之文至知苗匪于三月十七

圍攻台城公遂返旆援台未至而圍解公于三月二十九日至察看情形商之同事擬于撫中寓勦誅首惡以懲凶頑赦脅從以安反側同人所見相符乃寫告示遣良苗徧諭各寨使之捆送首惡或斬送首級其餘一概不問各寨願從業已收到首級八十餘忽從黃平僭事

黃平生員三人承州牧教官之意謁公請調兵三萬益以團衆十萬盡滅苗人公不允復赴省稟巡撫亦不允回日竟張示諭大書滅苗清產安屯設堡一日聚數千人聲言亮團以示威至近苗處苗數百人出而喊殺數千人潰而歸苗于是刻木相約千里苗疆紛然蜂起

五月中旬苗匪燒殺漢村並陷岩門司汎城戕殺文武官弁數人屠居民殆盡公率軍雕勦小捷者三至五月二十一日賊以十倍之衆與我軍鏖戰于排羊我軍敗績回台餉絀軍單賊氛徧地雖時常開仗僅能護城之附近而已

咸豐六年丙辰
年五十七歲正月胞弟培元卒于原籍

長女適同邑李氏

鎮遠文武約公至勝秉會合鎮軍勦辦大江小江之賊公于二月初二日拔營中途層層賊沮不能達勝宿于五岔賊日日圍攻公督軍力戰賊死傷無數十餘日後不復來攻

公于二十日率軍赴勝數十里間賊以數萬人層層截殺我軍大敗僅得入勝城至此始知鎮文武受巡撫密諭託辭誘公離台以保鎮遠明言之恐公不肯拔營也公駐勝休軍添造器械賊日來攻打我軍力拒賊不得逞後不復來城外但遠遠圍困公乃于四月十三日設法行走是日抵鎮

見我致魏令承祝書而敬禮者胡宮保也見我萬言書而收用于天津者陸道台後督兩江建瀛也見我萬言書而起敬于貴陽省城者臬司孔公之友瑚方伯兼護撫印呂公佺孫也四月中旬四川副將蔣玉龍率兵抵鎮五月初一初三與鎮營遊擊楊啓賢及公各以所部出紮老城擬先援勝秉次及台拱清江駐紮七十餘日打仗數十次六月內攻破塘頭哨賊營數日後賊壘又成七月

初二解米勝城以濟飢先派軍分破賊營疏通道路然後送米入勝老城至勝四十里送米之軍必于當日轉回方安往反八十里賊又營卡蟬聯層層沮截殊難萬全定計黎明出隊分襲賊營送米軍跟踪即進而分破賊營之軍又候于半途相接應故能一日往返無有沮滯

勝久苦饑米到縣丞止分給兵勇未給居民民有怨言是夜內應引賊入城城陷賊遂擾鎮西與鎮東之叩水一帶欲直抵青溪玉屏斷大河楚米以困鎮會議勝既難圖姑且保鎮議定蔣楊守鎮遠公紮叩水以護大河

公率所部七百人于七月十七日至叩賊初零星來哨尙未大舉收穫畢賊糾衆三萬來攻紮營十里内外日夜接仗我軍頗有斬獲十二月公用內應舉火夜襲賊營破之賊遁歸巢是秋奉

旨加道銜

十月補石阡府缺

咸豐七年丁巳

年五十八歲分軍紮營瓦寨長吉與叩犄角自五年六月餉糈不繼至是愈形支絀覺籌餉之難甚于勦賊

三地營盤勇丁長夫共二千五百人每月或打仗十餘次或數次不等均獲小捷

七月公兼署思州府辦叩思兩地之事思民抗糧紳衿把持公事業經數年公出示不要折銀止納本色不許淋尖踢斛天明開倉雖夜亦收雨雪亦收不使民久住城內民以爲便踴躍輸將擇紳衿刁劣之甚者懲治數人以後無敢恃符玩法惟軍餉匱竭不得不加意拊循愈撫愈驕漸不用命大爲可憂

九月接奉行知奉

旨韓超著軍機處記名遇有貴州道員缺出即行請

旨簡放欽此

咸豐八年戊午

年五十九歲去冬思南教匪竄擾石阡守告急公派潘弁帶勇三百五十人

往援連獲勝仗而賊愈聚愈多孤軍可慮是時印防緊要不便多調正月底公率勇百人繼進連日頗有斬獲遂由桶口渡河進紮一碗水乃賊穴也先是得勝追逐之時軍士貪擄財物離伍深入被賊捉去七人拷問知我虛實賊相謂曰彼軍雖勇我若以二三十人敵彼一人無不勝矣乃以萬餘人四面來攻更休迭進自卯至午我軍竭力抵禦卒以衆寡不敵大敗退至塘頭適印水有事兼聞思州另委人接署而以公署理鎮遠鎮印皆禦苗頭敵公自揣不能兩兼須繕稟辭委而思州交代之事亦須速辦遂回思署

二月卸思任以印營派都司潘忠友統領身駐玉屏措餉爲後路糧臺遙總軍務印瓦長吉不時接仗無大勝負

蔣玉龍積功洊升貴州提督久經戰陣恤下而善處同人駐兵鎮遠鎮倚賴之忽奉調援省中途又截留石阡一帶使勦教匪以後鎮之文武不和諸形踈懈八月二十九日賊乘夜來攻城陷

九月初一公聞鎮陷料賊必分路東下一撲印水一撲青溪兩地失則玉思柱

黎舉不可保乃一面飛函乞援湖南一面飭潘都司嚴守印水身赴青城以策青印兩地

青城北門墻塌公急修之城外擇隘築營並截斷水路賊見布置嚴密開仗數番不得逞而去遂專攻印水印軍初聞鎮失大駭咸欲退守玉屏潘不可陳說大義衆感動相誓死守賊以數十倍之衆圍攻三月逐日鏖戰屢瀕危險卒能却賊

楚軍大集與公克復鎮遠

咸豐九年己未

年六十歲二月奉

旨貴州糧儲道員缺著韓超補授欽此七月

誥贈夫人正室段氏卒于原籍

是冬公赴龍頸坳金鼎庵一帶督勦賊匪辦理府兵卽在龍頸坳度歲

咸豐十年庚申

年六十一歲三月公回玉屏因肅清思境于閏三月奉

上諭貴州糧儲道韓超著賞加按察司銜欽此

四月次孫方朴生

是月署理貴東兵備道卽在玉屏行營接印任事仍辦軍務

咸豐十一年辛酉

年六十二歲春間欽差大臣田署巡撫何調公晉省公將東道印及督辦軍務關防移交後任五月初二自玉起身二十八日至省六月委署臬司篆務兼總辦軍需總局

十月二十九日卸臬司事仍總辦軍需總局

是時軍餉無出全仗釐金釐穀以濟軍食而各分局委員往往不得其人致民嗟怨清鎮縣之鎮西衛分局委員貪暴任情民不堪命奸民乘機作亂糾衆數千人于十二月初三日毀局戕官占據衛城並分衆一撲清鎮城一撲省城聚集日多聲言數十萬省中大震當路問公如何辦理對曰誅首惡赦脅從國法

既伸亦不致激成大變辦理要速僉以爲是遂派唐遊擊帶兵千人隨公赴清鎮查辦唐領兵于初六先行公帶隨員三人于初七日出省中途見居民舉止失措訪之知匪徒徧送僞札妄言大兵將盡洗居民宜齊出抗禦不出者誅其全家因此進退兩難不知所措公知此情每經村寨則降輿開導之正在開導有省城行商陳姓自鎮西衛來詢以情形言之如繪並言不願爲亂者十之七八但聞大兵將不分皂白鷄犬不留是以有騎虎之勢若開一生路則各顧身家倏焉星散彼爲首倡亂之人無人輔翼何難擒之公聞而首肯立取所帶刊刷之告示數張並另寫告示數張付陳姓使轉回鎮西四處張貼兼口傳公語諭之大約謂止索爲首某某餘人不問同夥之人有擒斬首惡來獻者赦其罪與平民有功者同賞示諭一到萬衆歡聲若雷婦女恐爲官兵所辱臨水俟事急自溺者一概歸家執械在行者紛紛解散其分撲清鎮與省城者祇存四五千亦且多懷去志特不料首匪猶冀倖一擲強逼其衆來戰以致多殺生命也

初八日午時公至清正與唐遊擊議事忽報賊來公與唐登城觀之見數千人舉旗執械列于里許之地公于城上繕告示一紙粘高脚牌上募人執牌往諭令其退散不肯須臾鳴砲吹角吶喊而進唐曰似此不得不戰公曰然唐乃率軍出城正奇接應布置分明一陣衝殺匪等大敗斃數百人遁至二十里外民房住宿夜半唐兵與居民數人在山頭放砲三聲齊聲喊殺匪等驚竄其分攻省城者距省四十里亦被官兵打退

兵勇搶擄民間財物甚至誣指良民爲賊欲盡燒南城闔閭公止之一面慰民一面使唐執法斬數人始定

兵威大振亂民慄慄危懼公遣人諭之曰大兵不出城一步專待爾等自送首惡事要迅速莫使大兵久候或省中令我等帶兵往拿則諸多不便各鄉聞之連日捕送首惡共得三十餘人解省公親赴鎮西諭令安業每過村寨民皆焚香跪迎兩旬之內大亂平息

初八城下一仗生擒者連放數人最後又擒二人一漢一夷公語唐曰再放二人回去則匪黨立散唐曰漢是執旗頭目可送省報功單放一夷何如公曰有一頭目更好成事乃引二人跪地謂之曰汝二人一是頭目一是散人均應斬首然我不忍也此事之起本是局員不好然何不控告而不爲伸冤然後造反猶可解也今乃毀局戕官攻打城池一何愚蠢然我終因罪在局員不忍多殺適纔城下死數百人乃是自取若遵牌示退去豈有此事留汝二人不殺使歸告衆人速回家安業數萬人姓名官皆不知有何疑慮派充頭目者尙放回豈復尋問餘人哉所不赦者惟某某首惡而已釋其縛每人賞四金謂路費之餘買米鹽以度殘歲二人喜躍而去至鴨池河正值敗匪數百聚議抗兵見二人回又聞其言霎時各散

首惡欲假衆力謂大兵將盡殺居民擄搶妻女以恐嚇之民皆矍然驚疑辦理此事須先使大衆不驚不疑然後首惡孤立公在省與當路說定如此辦法乃到清後當路輕聽細人語屢函囑嚴辦似欲多殺又謂卽辦安撫亦宜紮兵鎮西衛以示威武公謂我與唐領大兵駐清城遙示形勢使趙本府及沈委員在

鎮西辦事一面安撫一面催縛首惡前日陣斃數百又陸續送首惡多人不可再肆殺戮駐兵清城不極兵力而可藉兵威以辦事若兵至衛城則首惡或誣稱來洗致大眾蜂起否則黨惡者驚疑避匿無人縛送首惡蓋首惡均已潛伏非其黨不知伏處而得之也陳說再三至以去就爭之乃已

同治元年壬戌

年六十三歲正月十一日奉到十一年十二月十九日

上諭韓超著賞加布政使銜併賞給武勇巴圖魯名號以示獎勵欽此十四日奉到十一年十二月二十三日

上諭韓超著賞給二品頂戴署理貴州巡撫田興恕著無庸兼署欽此公于正月二十日到巡撫任

公與田軍門和衷共事奈田自正月染疾日久弗痊不能親出辦賊軍務日見廢弛

秋日爲天主教事四川將軍總督奉

旨選派大員來黔查辦

同治二年癸亥

年六十四歲正月三孫福才生是月聞交卸信奏稱患病請催新任速來接印以便卸事調理奉

旨不允意欲使理軍事三月初六日卸事夏間總督勞署巡撫張合奏謂公患病屬寔所有被索各款皆係事屬因公黔有案牘可稽無庸守候可回籍就醫俟查明續奏在籍聽候部議公于十一月到家是年次女生

同治三年甲子

年六十五歲家居養病

同治四年乙丑

年六十六歲是年九月四孫乙良生 叅款部議候補官日罰俸九個月十一月因奉省馬賊披猖關內土匪亦蠢蠢欲動 制府劉蔭渠先生撥軍分

駐並奏辦團練請以公督辦永郡團防奉

旨允準

同治五年丙寅

年六十七歲督辦團練

同治六年丁卯

年六十八歲督辦團練

同治七年戊辰

年六十九歲督辦團練是年長孫方炳成室

同治八年己巳

年七十歲督辦團練經 制府湘鄉曾相國奏獎 部議免其從前一切處分

並加一級紀錄二次奉

旨依議

同治九年庚午

年七十一歲

同治十年辛未

年七十二歲

同治十一年壬申

年七十三歲

同治十二年癸酉

年七十四歲長孫方炳入泮長孫婦卒

是年長孫續絃

同治十三年甲戌

年七十五歲

光緒元年乙亥

年七十六歲

光緒二年丙子

年七十七歲次孫方朴成室

光緒三年丁丑

年七十八歲是年十月曾孫秀尹生

光緒四年戊寅

年七十九歲正口口感冒風寒延醫調治繼而宿疾頓發周身冷戰四肢抽縮
四月初二日病故

附玩寇新書回目

是書係貴州幕友某君所撰甫將回目編定將撰書或阻之曰是書若成恨汝者必
多將擠死矣遂輟不作予從友人處錄得序及回目今錄如左
玩寇新書序

吾黔地瘠民貧數年來烽烟四起城邑爲墟秉政者庸懦無能毫無措置而貪婪忌
刻之徒猶且自作威福視民瘼於罔聞致使上干天怒下招人怨禍有不可勝言者
僕一介書生手無尺寸觀滿地之瘡痍心竊憫焉茲集近事名曰玩寇新書其間忠
佞賢奸不一而足然好善惡惡人之常情或褒或貶概從實錄雖稗官野史其有關
於世道人心者匪淺但願天心厭亂及早太平則天下幸甚謹序

第一回

蜀道人惑衆造妖言

楊皂隸揭竿舉大事

第二回

桐梓城小霸王劫獄

仁懷縣容賢令歸天

第三回

朱太守倉皇招練

常副戎勉強出師

第四回

蔣撫台聞報大驚慌

承觀察獻諛籌計策

- 第五回 陶保捐軀同時殉難 徐韓奮勇兩路進兵
- 第六回 真藩司螺獅堰喪師 偽將軍雷台山掛印
- 第七回 退烏江藏身孔固 屯扎佐裹足不前
- 第八回 乘夜開城大將驚心頻往返 登高觀戰么麼鼓掌大擲揄
- 第九回 趙軍門高臥寸步不行 羅督師貪杯一籌莫展
- 第十回 調度無方蔣爵遠自居庸懦 逢迎有術魯經芳妄逞才能
- 第十一回 崇野漁七口遭殃 朱秋田全家被禍
- 第十二回 走新城黃學使徒步 復普安崇少君乞師
- 第十三回 結齋匪楊逆走新場 調夷人曹瞞鎮大定
- 第十四回 福觀察黔西解圍 韓太守坡貢殺賊
- 第十五回 楊將軍刎死葛庄司 苗大王鬧進黃平府
- 第十六回 刊告示主意招安 免征糧妄思要結
- 第十七回 張道台吁嗟散練 萬軍門憤班師

- 第十八回 粉飾太平堪笑中丞空奏凱 鑽營保舉可憐羣小盡陞官
- 第十九回 賊破岩門陳彭被燬 軍臨貴定吳魯專權
- 第二十回 設糧台剋扣無遺 開捐局錙銖必計
- 第二十一回 抹牌終日何榜眼賞戴花翎 醉酒連朝沈首縣榮膺知府
- 第二十二回 黃鄉紳勒索捐輸 高提舉糊塗團練
- 第二十三回 徐舉人抗糧滋事 葛太守爲國亡身
- 第二十四回 松桃城程鏞被難 荔波縣蔣令捐生
- 第二十五回 困危城馬世璜縊死八寨 絕餉道嚴錫珍餓斃丹江
- 第二十六回 黃鳳赴義死爐山 承齡偷生走平越
- 第二十七回 張巡道兵敗舊縣 馬都司戰死新城
- 第二十八回 清水江老幼遭枉死 武侯祠練勇肆行兇
- 第二十九回 陸滋秀以典史之官而盡節 賈致恂藉中堂之勢而冒功
- 第三十回 吳夫人出頭控告 承老板搖尾乞憐

第三十一回 弔雪齋承觀察靈前假痛哭 賂寡婦蔣中丞背後裝糊塗
第三十二回 畢繆二豎子左幹右旋 儲舒兩奸人東奔西走
第三十三回 余申之利口弄是非 周友松厚顏甘諂媚
第三十四回 招賭友承志玷官箴 捕跟丁炳綱亂家法
第三十五回 飽私囊收買鈔票 侵公項建造軍裝
第三十六回 沈通判追賊遽喪身 劉太守受傷懷退志
第三十七回 王鹽道坐守鎮甯城 恒制軍移駐貴州省
第三十八回 大小戶重掛捐輸 內外城嚴加巡察
第三十九回 王安國智獲大主公 恒宜亭怒罵小雜種
第四十回 統率三軍揚威耀武 連亡八縣喪氣垂頭
第四十一回 劉寶善陣亡忠臣有後 于鍾敏天逝孝子無功
第四十二回 宣廟哭聖人鄧文熾從容就義 偏橋作孤鬼劉玉麟慷慨亡身
第四十三回 孝軍門威震定番山 陳翼長兵敗楊老驛

第四十四回 馬鞍山張天師被刺 龍頭營巴圖魯陳兵
第四十五回 困麻沙孝順寡勝衆 援濱水韓超逸待勞
第四十六回 駐貴定糜餉勞師 陷都勻驚心破膽
第四十七回 石鹿二守共捐生 陶周兩家同死絕
第四十八回 王敬烈革職提省 陳得功帶罪回營
第四十九回 楊承照死猶有恨 高得善生亦何爲
第五十回 石阡城撞死長人 古州鎮逃回幼子
第五十一回 炳藩政貪婪藉端剋餉 恒制軍畏縮託故退師
第五十二回 委善安暮夜進苞苴 復三脚憑定攬樓閣
第五十三回 丁但二翰林風流買妾 陳王兩烈婦生死從夫
第五十四回 大公館拜佛招靈 糧道署挾優飲酒
第五十五回 余幕友行街訪妓女 葛委員挨店逐難民
第五十六回 楊兵道被擄太平場 孝提台克復都勻府

右韓南溪四種皆記昌黎韓南溪中丞在貴州戰事內獨山平匪記遵義平匪日記
題曰空六居士撰蓋公幕府中人韓南溪年譜則公幕友陳君昌運所編惟平苗紀
畧爲公手自編述邊省兵事多爲中原所不聞難裏瘡苦戰而較之樹牙轟於內地
各行省者隱顯乃什百倍蓋地既窮僻復無文學之士爲之揄揚致淹沒不彰若此
戰迹者何可勝道是亦人間極不平之事矣是書余在南皮幕中於君立部郎案頭
見之亟寫得一冊今年始刻入叢書蓋亦幸而獲存者矣又玩寇新書回目亦得之
君立今附此亦事相涉云庚戌汪康年跋



